

# Protocol dalla 69avla radunonza generala dall'uniun da dunnas Laax, ils 10 da november 2018 allas 19.00 uras ella Sentupada a Laax

## Tractandas:

1. Beinvegni
2. Elecziun da duas dumbravuschs
3. Prelecziun parziala ed approbaziun dil protocol
4. Rapports annuals
5. Rendaquen e budget 2019
6. Elecziuns
  - a) Elecziun da treis suprastontas novas
  - b) Elecziun dad ina nova revisura
7. Program pigl onn 2019
8. Fixar la contribuziun annuala 2019
9. Honoraziuns
10. Varia

## 1. Beinvegni

Nossa presidenta, Mascha Hug fa a tuttas commembras in cordial beinvegni alla 69avla radunonza generala e menziunescha ch' ella vegni a menar la radunonza per gronda part per romontsch.

Sco introducziun udin nus il toc da musica "New Age". Quel ha Mascha gia schau tedlar duront sia emprema radunonza sco presidenta avon 8 onns.

Seperstgisadas per questa sera ein:

Isabelle Mäder, Charlotte Peyer, Luzia Camathias, Iris Eigenmann Veraguth, Lukrezia Werner, Eveline Brägger – Camathias, Barbara Rupp, Lea Steiner, Deborah Coray, Claudia Palaia, Ruth Günthardt, Maria Camenisch, Maria Caviezel, Gerda Manning, Martina Wolf, Nesa Coray, Franziska Räber e Thildi Frei.

Presentas questa sera ein 54 commembras.

## 2. Elecziun da duas dumbravuschs

Las dunnas Paulina Arpagaus ed Anna Erni vegnan elegidas sco dumbravuschs.

## 3. Prelecziun parziala ed approbaziun dil protocol

Annette Capaul prelegia ils puncts impurtonts dil protocol dalla davosa radunonza generala. Il protocol vegn approbaus cun vusch unanima.

## 4. Rapports annuals

### A > Rapport presidial ed approbaziun

Mascha Hug prelegia siu rapport presidial. Per buca trer memia fetg alla liunga la radunonza, desista ella dad in sguard sin sia entira perioda d' uffeci sco presidenta.

Cuort suenter la radunonza generala essan nus sentupadas a caschun dalla messa fundada per nossas defunctas. Nus havein envidau ina candeila per Elisabeth Coray ed urau per ella.

Per l'emprema dumengia d' Advent han Paulina Arpagaus e Sonja Cavegn ornau in bellezza tschupi d' Advent en baselgia.

Fin december havein nus purschii a hosps ed indigens punsch e mandlas barschadas sin in stan avon il center communal. Quei suentermiezdi havein fatg in pign gudogn per nossa cassa dall' uniu.

Per il suentermiezdi da skis che ha giu liug duront la jamna da scola da skis dils affons, ein mo 4 dunnas s' annunziadas. Nus havein denton gudiu da saver far entgins bials carauns ensemen.

Il cuors da cuorsaliunga ha era quest unviern buca giu liug. Munconza da neiv ei uonn segir buca stau il motiv. Nus sperein da saver porscher quel igl unviern proxim.

La messa cun unziun ei curdada uonn pervia d'ina collisiun da termin cun ina sepultura.

L' entschatta mars havein nus vendiu rosas per il di d' acziun da rosas avon il Volg.

L' uniu da dunnas ei responsabla per l' administraziun dallas rassas da Dumengi' alva. Uonn ei questa lavur denton buca stada stentusa, damai che mo ina buoba ha festivau Dumengi' alva a Laax.

Fin matg havein nus organisau il lotto per nossas senioras e nos seniors. Nus havein giugau lotto e saviu reparter entgins bials premis. Igl ei stau in suentermiezdi divertent cun buna petta.

Medemamein duront il matg ei in triep dunnas serimnaus per cuschinar tratgas indic vegeterianas en „Julia's Loftkitchen“ a Cuera. Leu ha in cuschinier dall' India tradiu a nus ils misteris dalla cuschina dall' India. Igl ei stau ina sera fetg varionta cun buna cumpignia en in bellezza ambient. Alla fin ha il cuschinier schizun cantau per nus musica tradiziunala.

El zercladur havein nus organisau il viadi da seniors, il qual vegn orgaisaus alternond dall' uniu samaritana e l' uniu da dunnas. Cun igl auto da posta da duas alzas essan nus carrai cun ils seniors tochen a Bilten. Leu havein nus visitau la fabrica da tschugalata Läderach. Nus havein astgau tedlar in interessant referat sur digl origin e sur dalla produziun da tschugalata. Il temps da comprar enqual buna caussa ella stizun ha era buca astgau esser memia cuorts. Suenter essan carrai vinavon tochen a Weesen sper il lag Rivaun nua che nus havein gentau ell' ustria „Schwert“. Silsuenter ein tut ils seniors vegni accumpignai sil bastiment. Nus havein gudiu in bellezza suentermiezdi da sulegl duront navigar enviers Walenstadt. In grond engraziament alla Sonja per la grondiusa organizaziun.

Miez zerladur vein nus schubergiau la baselgia sut la bitgetta da Paulina Arpagaus. Sco adina havein nus giu a fin relativamein spert. Nus havein aunc saviu guder buns stortins e caffès en cumpignia.

Fin fenadur ha il marcau dil vitg giu liug e sco adina havein era nus giu in stan cun l' uniu da dunnas. Uonn havein nus empruau da vender glatsch dil bein puril sper las bunas pettas. Il marcau dil vitg ei per nus adina ina buna caschun da far reclama per noss' uniu. Malgrad aura malemperneivla, eis ei reussiu a nus da far in bi gudogn per nossa cassa.

Fin november essan nus serendidas a Bogn Ragaz cun 30 commembras. Nus havein visitau la fatschenta „Ecco Jäger“ cun sia farma dad aquaponik. Philipp Gschwend ha menau nus tras la zun interessanta interpresa e saviu declarar a nus ina massa sur da lur products. Pèschs eran deplorablamein quasi negins en lur tancs, mo igl ei tuttina stau fetg divertent. Franz e Philipp Gschwend han silsuenter aunc envidau nus ad in marviglius aperitiv cun in buontad vin. Sco finiziun dalla sera havein nus aunc magliu pizza ell' ustria „Oldtimer“ a Cuera.

Era la gruppa da Line Dance ha puspei saltau mordio. Il cuors per igl onn proxim ei gia organisaus. Aurelia Caviezel informescha bugen en caussa.

Avon che serrar il rapport presidial drezza Mascha siu plaid a sias collegas da suprastonza. Annette Capaul ei stada 10 onns responsabla per la cassa dall' uniu. Ella ei stada ina persuna fetg cunscienziusa ed ha luvrau fetg exact. Ins ha adina saviu sefidar dad ella tschien per tschien. Annette ei era adina stada promta da dar cussegl. Cunzun tier las fiastas digl emprem d' uost ei Annette stada ina petga indispensabla per l' uniu. Nus engraziein ad Annette zun fetg per sia gronda lavur a favur dall' uniu da dunnas Laax. Sonja Cavegn ei stada 4 onns en suprastonza. Sonja ei s'integrada fetg spert ella suprastonza ed ha exequiu las lavurs surdadas ad ella cun bravura. Ella ha fatg sias

lavurs cun tgierp ed olma. Sonja ei cunzun era s'engaschada per la termagliera. Cun lezza ha ella giu bia lavur ils davos onns cun quei ch'ei ha dau midadas da locals e menadras. Sonja haveva era ina relaziun fetg cordiala cun ils affons che vegneva apreziada da tuttas varts.

Plinavon ei Sonja stada responsabla per organisar ils viadis dall' uniun e dils seniors. Sonja ha fatg quei cun tgierp ed olma ed ha organisau ils viadis a moda perfetga.

Nus engraziein a Sonja per sia grondiusa lavur en favur dall' uniun da dunnas Laax.

Il rapport vegn approbaus unanimamein cun in grond applaus.

## **B > Prelecziun dil rapport dalla termagliera**

Muort collisiun da termins sa nossa menadra dalla termagliera, Iris Veraguth Eigenmann, buca esser presenta questa sera. Sonja Cavegn raquenta aschia a nus enzatgei dalla termagliera.

Nus menein uonn la termagliera cun 3 gruppas à mintgamai duas uras. En tut ha ei 21 affons en nossa termagliera. Nossa menadra Iris ei actualmein vid terminar la scolaziun sco menadra da gruppas da giugar. El num dad Iris metta Sonja a cor allas presentas che la termagliera seigi buca ina scoletta pintga. La finamira dalla termagliera ei giugar, esser creativ ed emprender il secuntener social.

## **5. Rendaquen e budget 2019**

Nossa cassiera Annette Capaul presenta il quen digl onn 2017 / 2018.

Il gudogn dil stan da punsch ei staus plitost mediochers. Il gudogn dil marcau dil vitg perencunter ei uonn staus empau pli gronds. Ella engrazia a tuttas dunnas che ein segidadas sin ina ni l'autra moda.

Da menziunar tier il quen actual ei cunzun che la vischnaunca e la Pro Laax han surpriu il deficit dalla termagliera. Els vegnan era a surprender quei el futur.

Plinavon ei da remarcar ch' ils daners dall' uniun da tir che nus havein dabien per nies agid al tir cantunal grischun ein aunc buca arrivai.

Cassa:	Fr. 241.01
Conto da spargn Raiffeisen	Fr. 9'632.67
Total	Fr. 9'873.68

Facultad ils 31 d'october 2017	Fr. 11'792.36
Facultad ils 31 d'october 2018	Fr. 9'873.68
Sperdita	Fr. 1'918.68

Denteren menziunescha Sonja la damonda dad Erwin Ardüser pertuccond la Fundaziun Pro Laax. Il suprastont Corsin Caduff remetta siu uffeci sin fin zercladur 2019. La fundaziun havess grond plascher sch'els vegnessan puspei dad integrar ina dunna en lur suprastonza. Sch'ina dunna dalla uniun sesenta plidentada, astga ella bugen s'informar tier Sonja.

## **A > Rapport dallas revisuras**

Las revisuras Petra Killias e Miarta Schöller attestan ch'il quen dall' uniun da dunnas ei menaus schubers e che tuttas quittanzas ein avon maun. Ellas proponan dad approbar il quen.

Il quen digl onn 2018 vegn approbaus cun vusch unanima e cun in grond engraziament alla cassiera.

## **B) Presentaziun dil preventiv**

Nossa cassiera Annette presenta il preventiv pigl onn 2019.

Tier il preventiv dat ei neginas damondas ed el vegn approbaus unanimamein dallas commembras.

## 6. Elecziuns

### A > Elecziun da treis suprastontas novas

Uonn ei l'emprema gada che la presidenta Mascha selegra sin questa tractanda. Perquei che las duas dunnas Seraina Cathomen e Simona Camathias ein gia igl onn vargau sedeclaradas prontas da schar eleger en suprastonza, ei la presidenta cuntenta. Igl onn vargau haveva aunc la tiarza dunna per en suprastonza muncau. Seraina e Simona han denton beinspert saviu perschader Rita Arpagaus da surprender il tierz post en suprastonza.

Las treis dunnas han duront igl onn vargau saviu accompagnar la suprastonza veglia ed han gia mezzas organisau certas activitads. Ellas han gia massa novas ideas ch' ellas lessan metter entuorn ils proxims onns.

Igl ei per la suprastonza partenta in temps ideal per surdar il tgamun alla proxima generaziun. Las treis dunnas novas ein mummas giuvnas ch' ein activas gia oz ella veta da mintgadi el vitg. Ellas vegnan era ad haver in bien access tier las dunnas giuvnas en vischnaunca.

La presidenta Mascha supplichescha las novas da sepresentar cuortamein.

Perquei che nus vegnin uonn excepziunalmein a votar gest 3 novas dunnas, vegnan Seraina e Simona elegidas per 3 onns e Rita per ina perioda da 2 onns. Aschia vegn igl endretg ciclus puspei mess en vigur.

L'elecziun da Seraina sco presidenta, Simona sco actua e Rita sco cassiera vegn confirmada cun vusch unanima e cun in grond applaus.

### B > Elecziun dad ina nova revisura

Suenter ina activitad da 24 onns sco revisura, stuein nus uonn remplazzar Miarta Schöller. La suprastonza ha gia anflau avon la radunonza ina persuna ch' ei promta da suprender quest pensum. Quei ei Kathy Wyss. Ella vegn elegida cun vusch unanima. Engraziel fetg.

## 7. Program pigl onn 2019

Avon la presentaziun dil program annual presenta Simona Camathias l' evaluaziun dil questunari ch' ei vegnius partius ora duront la stad 2018. 39 dunnas ein separticipadas al questunari ed han purtau massa buns resuns ed inputs per la lavur futura en suprastonza.

La presentaziun dil program annual per igl onn vegnent surpren la nova presidenta Seraina Cathomen. Ella engrazia ordavon a tuttas dunnas per la fidonza demussada cun eleger la nova suprastonza.

### A > Differentas lavurs

Uonn ein pliras lavurs impurtontas sil plan da lavur per nossa uniun:

- preparar il tschupi d' Advent
- Advent da seniors
- til da latiarnas per ils affons dalla termagliera e scoletta che remplazza il stan da punsch alla fin digl onn
- messa cun unenziun
- acziun da vender rosas
- lavar ora la baselgia
- marcau dil vitg
- fiasta naziunala: Quella ei fetg impurtonta per nossa cassa, perquei che quei ei la pli gronda occurenza per nus da recaltgar daners. Igl agid da mintga dunna ei dumandaus tier quella occurenza.

### B > cuors ed activitads

- schaner: occurenza d' unviern: viagiar, ir cun skis e guder in bien fondue
- fevrer: cuors da cuorsaliunga
- mars: activitad da primavera
- avrel: spassegiada cun guid tras il vitg da Laax, cun aperitiv
- matg: cuors da cuschinar
- zercladur, fenadur, uost: neginas activitads muort grond engaschi da lavur cun marcau dil vitg ed emprem d' uost

- settember: occurenza d' atun (cuors ni referat)
- october: viandada d' atun

Per tuttas lavurs ed activitads vegn schau circular gliestas per s' inscriber nua ch' ins sa s' engaschar cun luvrar, far pettas etc.

Plinavon vegn schau circular la gliesta da presenza cun il giavisch dad indicar co mintga dunna less vegnir informada el futur, seigi quei per mail, whats app, sms ni fegl official.

## 8. Fixar la contribuziun annuala

La suprastonza fa la proposta da restar sin Fr. 20.00 contribuziun annuala per commembra.  
La proposta vegn acceptada unanimamein.

## 9. Honoraziuns

Sco prem engrazia la presidenta a Mierta Schöller ch' ei stada tons onns revisura da quen. Per ses 24 onns ha ella meritau in grond applaus.

Uonn havein nus treis commembras che astgan senumnar da niev commembras d'honor.  
Quei ein: Julia Coray, Nesa Coray e Hedi Pohle. Cordiala gratulaziun!

Seraina engrazia medemamein alla suprastonza partenta e surdat ad ellas fluras e bons sco engraziament.

## 10. Varia

### **Mutaziuns:**

Uonn havein nus 10 entradas novas en nossa uniun, tgei ch' ei fetg legreivel. Las dunnas novas senumnan: Petra Mehler, Ursula Elisa Brenn, Barbara Hunziker – Sax, Marlene Gliott, Corinne Rietmann – Kurz, Patrizia Hänggi – Coray, Milena Matter, Eveline Brägger – Camathias, Franziska Räber e Giulia Caduff.  
Mascha supplichescha ellas da star cuort sin peis. Las commembras novas vegnan beneventadas cun in grond applaus.

Deplorablamein havein nus in'extrada dall'uniun, quei ei Deborah Coray.

### **Commemoraziun per las commembras defunctas:**

Uonn havein nus stuiu prender cumiau da dunna Judith Cahannes. Nus envidein ina candeila per ella e stein sin peis per in cuort silenzi.

### **Messa per las defunctas:**

La messa per nossa commembra defuncta Judith Cahannes vegn ad haver liug il mardis suenter radunonza generala.

La presidenta surdat sco finiziun aunc il plaid a sur Bronislaw Krawiec. El engrazia allas commembras per la gronda lavur ch' ellas prestan mintg' onn a favur dalla pleiv.

Mascha Hug siara la radunonza generala allas 20.30 uras. Ella envida tuttas commembras tier in pign pushegn ed in migiel vin.

Laax, 25.11.2018  
Per l' uniun da dunnas,  
l' actura, Simona Camathias